

Protocol fat bun da la radunanza cumünala dals 17 settember 2009

Protocol da la radunanza cumünala dals 9 lügl 2009, acta 3

Preschaintas: 18 personas

S-chüsats: Marianne Werro ed Albert Mayer

Il capo constata cha la radunanza saja gnüda convochada in basa a nossa constituziun cumünala e dumonda sch'inchün haja da far objecziuns. Sainza chi vegnan fattas objecziuns, vegnan nominats seguaints scrutinadurs: Andri Taverna e Jöri Felix.

Tractandas:

1. Protocol da la radunanza cumünala dals 17 gün 2009, acta 2

L'actuar prelegia il protocol da l'ultima radunanza cumünala. Il protocol vain approvà.

2. Rendaquint cumünal 2008

Il capo repassa chapitel per chapitel dal quint da gestiun e remarcha ils posts chi muossan üna differenza plü gronda in congual cun l'on avant e cul preventiv. Ils schefs dals differents decasteris dan üna cuorta survista da lur departamaints.

Pro'l departamaint da turissem daja ün' animada discussiun a regard l'utilisaziun dals mezs da las taxas da cura e quellas da la taxa da promoziun pel turissem. Cun quai cha la collavuraziun culla ESTAG ha cumanzà d'immez l'on aint e'ls mezs finansials van nouv al cumün, sun las cifras pel on 2008 amo pac indicativas. Per l'on 2009 sun las sortidas a favur dal turissem documentadas plü bain.

Il quint cumünal 2008 serra cun entradas da fr. 7'463'075.13 e sortidas da fr. 7'291'503.80 e davo resguardadas las amortisaziuns da fr. 626'925.15, cun ün vanz da fr. 171'571.33.

Il quint d'investiziun pel 2008 serra cun entradas da fr. 774'330.45 e sortidas da fr. 1'645'443.25, cun ün investiziun netta da fr. 871'112.80.

Il bilantsch cumünal 2008 muossa ün chapital agen da fr. 303'165.59.

Il capo preschainta cuort e summaricamaing il rendaquint da l'ameglioraziun pel 2008.

Il president da la cumischiun sindicatoria, sar Andri Linsel, orientescha sur da la revisiun fatta per la prüma jada tras il büro da la Lischana Fiduziari SA da Scuol. A man da cifras indicativas da finanzas declera el la situaziun generala dal Cumün da Sent. Il decasteris d'aua, chanelisaziun, electric ed immundizchas vegnan cuvernats plainamaing cullas taxas. Quist fat es fich allegraivel. Eir scha'l cumün da Sent sta pel mumaint finansial plü bain, raccumonda la cumischiun sindicatoria al cussagl cumünal da far be investiziuns necessarias, perchè cha in l'infrastructura stuvaran gnir fattas i'ls prossems ons gronda investiziuns. Oters tschögn e cussagls al cussagl cumünal stan scrits aint il rapport detaglià da la revisiun. La cumischiun sindicatoria propuona a la radunanza d'acceptar il rendaquint sco preschantà e da dar dis-charg als organs respunsabels.

La radunanza cumünala decida, sainza cuntravusch, da far bun il rendaquint cumünal, il quint da gestiun, il quint d'investiziun, il bilantsch cumünal e'l rendaquint da l'ameglioraziun pel 2008.

Rendaquint cumünal
2008

3. Lavurs d'infrastructura Palüds da Sala – Credit net da fr. 79'000.--

Il schef d'aua, chanelisaziun ed electric, Chasper Alexander Felix, orientescha sur da quista lavur previsa illa infrastructura cumünala.

Per cha la famiglia Rüedi possa cumanzar a fabricar es il cumün in dovair da spostar las lingias d'infrastructura chi passan tras quella parcella. Ils cuosts as cumpuonan seguaintamaing:

Chanelisaziun: Fr. 38'500.--

Aua: Fr. 29'000.--

Energia: Fr. 11'500.--

Davo avair dudi ün pêr votums our dal ravuogl da la radunanza cumünala e davo avair fat amo alch müdamaint vi dal proget decida la radunanza cumünala in scrutin serrà, cun 18 cunter 0 vuschs da far bun il credit da fr. 79'000.-- per la lavur manzunada aint il titul.

4. Varia

1. Departamaint da vias

I vain remarchà cha in plüs lös nu saja gnü refat (catramà) tocs da vias o fouras. Tschertas lavurs nu sajan gnüdas fattas in quella qualità sco chi tocca. I füss bun da far tschertas lavurs plü professiunalmaint e da controllar la lavur fatta. Il schef da strada piglia l'intimaziun incunter e conferma chi gnian fats plüs flics d'instà.

2. Palperi cun visiuns dal Forum economic EB

Our d'ün protocol s'haja pudü leger d'ün palperi cun visiuns dal Forum economic da la regiun dal PN. Ün votant vess gugent da savair daplü.

Il capo orientescha cha quai saja ün palperi cun visiuns per l'avegnir (2025) da la regiun. Sün divers secturs as haja ideas e visiuns chi's po sustgnair ed eir robas chi pon gnir criticadas. Ils cumüns han survgni quista documainta per tour lasupra posiziun.

3. Griankopf – (Piz Uina)

Sar Georg Buchli giavüscha chi gnia reponderà la decisiun tratta dal Cussagl cumünal dals 30 avrigl 2007 da na vulair agiundscher al nom "Griankopf" il nom Piz Uina. Il capo piglia il giavüsch incunter ed il Cussagl cumünal tratta la chosa danouvmaing.

4. Lingia per la zocca

Ils paur chi possedan stallas sur il cumün passan cun lur zocca suvent tras cumün, quai causescha ün tschert disturbi. Ün votant dumonda schi nu füss pussibel da metter aint ils s-chavs da la sauaziun, chi sun actualmaing averts, tübs, chi transporteschan la zocca suot cumün.

Il schef da god e pauraria sclerischa la chosa.

5. Planisaziun cumünala

Ün votant remarcha cha la parcella illa Palüds da Sala d'eira gnüda avant 25 – 30 ons missa illa zona da fabrica. Uossa s'haja d'investir ün discret import per müdar in quel lö las lingias d'infrastructura. Tenor el füssa a seis temp da ponderar dad ingaschar ün nouv planisader cumünal.

Infrastructura
Palüds da Sala,
credit fr. 79'000.--

Varia